

(Est alligat. cod. III, 79 bibl. univ. Graec. in fine.)

Gregorius episcopus servus servorum dei dilecto filio nobili viro Lodovico comiti palatino Reni salutem et apostolicam benedictionem. Fictiones ille, quas tua nobilitas scribit ab adversariis in illis partibus emanasse, nobis displicent, cum a fonte maligno derivent et similes sint illis, que facte fuerunt in conciliabulo Pisano, unde tot sunt secuta mala, utinam non eveniant graviora de hoc secundo per eos Constantie ordinato. Sed nec minus displicent cepta, principia et modi hucusque retenti per principem istum Hungarie, super quibus a iam diu decrevimus ad te et alios remittere, quoniam gravia sunt et non ad pacem tendentia, sicut credimus etiam te sentire. Et quamvis sit retardatum de mittendo, nichilominus omnino decrevimus mittere. Sed quia nondum habuimus, quod modi transmissi tibi venerint ad notitiam ipsius regis, per quos poterat satis comprehendere de intentione nostra, deliberationes nostre retardate sunt. Ab ipso quidem initio et continue optimum putavimus ipsos modos copiose communicari, quod et desideravimus, et presertim voluissemus pervenisse ad noticiam ipsius regis, de quo aliter sperabamus quam nunc percipiamus. Deus tamen, in quo spem nostram posuimus, omnia reparare potest et evacuare omnes iniustos conatus, contra quos decet tuam nobilitatem et alios catholicos et fideles se in virtute altissimi opponere, et, cum res et tempus postulent, occurrentia queque super hiis, quam frequencius potes, mittere vel scribere secundum exigenciam non retardes.

Datum Arimini III. kalendas martii, pontificatus nostri anno octavo.

G. de Imola.

Orig. in perg.

---